

Guangjisi Minzcu Bau

ganhhau: CN45-0036 B.2017 Nd.10 Ng.18 liggaeuq dingyoux nienz ndwenbet ngeihgouj

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3295期

Liujcouh Si Yungh Lai Cungj Banhfap Cuknet Minzcu Doxgiet Cinbu Cauxlaeb Haeuj Hagdangz Hozdung

柳州市多举措夯实民族团结进步创建进学校活动

Liujcouh Si gak loh hagdangz ciuq gij saedsaeh bonjfaenh, gaenx-maenx haiguh minzcu doxgiet cinbu cauxlaeb haeuj hagdangz hozdung, roengzrengz cau ok gij fungheiq moq ndawhag hagseng gak minzcu daengx si huzndei caemhyouq, doxgiet roengzrengz baenaj.

It dwg genhciz hingzik cau-moq, gyaak cauxlaeb hozdung yaugo. Doenggvaq guh bauq fwngzcau, hwzbanjbau minzcu vwnzva, dajcauh luengqhongh raez vwnzva cawjdaez minzcu doxgiet cinbu gyauyuz daengj, cau ok gij heiqfaenh naekna minzcu doxgiet. Doenggvaq cujiz daet ceij minzcu lai cungj lai yiengh, hagseng gak minzcu fwngz yien fwngz doxgyau cingzgeih daengj cawjdaez hozdung, aeu minzcu doxgiet cinbu gyauyuz yungzhaeuj gak

hangh vwnzdij hozdung bae.

Ngeih dwg genhciz senhyangj yinxlingx, daezsang cauxlaeb hozdung caetliengh. Doiq hagdangz mbouj doengz doiqsiengq, gaenxmaenx fatok senhconz gyauyuz cozyung, daw minzcu lijn dangj caeuq guekgya, minzcu fapldw fapgi caeuq gij youqgaenjsingq minzcu doxgiet, yungzhaeuj son' gyauq hagseng sw-hsiengj cwngci bae. Cungfaen leih-yungh bauqceij ganhvuz ndawhag, gvangjbo ndawhag, muengx ndawhag daengj senhconz meizgai, gya' gvangq roen senhconz, gyalai senhconz hingzik, gya' gvangq senhconz yaugo.

Sam dwg genhciz saedguh giethab, fungfouq cauxlaeb hozdung neihanz. Cujiz gij ndawbiengz saedguh hozdung hingzik lai yiengh

haenx, yungh gyajseizhwngq gyaj-seiznit, bae lajmbanj, haiguh yawj-ngonz caeuq daejniemh hozdung, sonyinx gyoengq hagseng gyaez hagdangz hoh hagdangz, son' gyauq gyoengq hagseng gyaez guekgya, gyaez mbanjranz, gagrox henhoh gij gizmen ndei minzcu doxgiet.

Seiq dwg mingzdingh cauxlaeb iugouz. Netsaed gaem ndei minzcu doxgiet gyauyuz haeuj dangzgoq, haeuj sawsonhag, haeuj ukgyaeuj; cujiz ndei sonhag hozdung, cujiz ndei hozdung seiz rogdangz, fatok gij cozyung ndawbiengz gyauyuz caeuq gyaranz gyauyuz; doiqciuq cauxlaeb hozdung cwzbingz cijbyauh, gug hangh doeksaed, bouj caez gij nyieg, gaenxmaenx cau ok gij heiqfaenh ndei cauxlaeb hozdung haenx.

(Cauh Liujgen/邹柳健)

SIUSIK DINJ

简讯

● Bineix daeuj, Denzlinz Yen laebdaeb baengh gijndei swyenz swyenz bya sang ndoeng mwn, gaenxmaenx haeujcoengh gujli nungzhoh hwngfat ndaw ndoeng ginghci, linzyez gyonj-gyoeb yauqik caenh' itbough daez-sang. Daengz seizneix, daengx yienh hwngfat ndaw ndoeng ginghci mienhcik daengz 115.5 fanh moux, nangqdaengz nungz-hoh 3.3 fanh ranz 14.8 fanh vnz, ndaw ndoeng ginghci cungcanjiz daengz 11.2335 ik maenz.

(Liuz Hungzfuz)

● Ndwen 10 ngoenz 13, Cingsih Si Saedniemh Siujyoz youq ndawhag banh aen hozdung angqhoh ngoenz laebdoih sau-senhdui aen cawjdaez dwg "angqcoux Cibgouj Daih caez guh siengjmuengh Cungguek". Angqhoh hozdung baugvat duiyenz moq haeuj doih yizsi, hawj duiyenz moq fat mbaw-binsuh, hawj geiz daengj, langh-baij le hagseng iq daihneix swnjcienz caeuq fatyengz gij ceiqheiq buekguh caeuq gien-dingh gietsim cangzcwngh cing-saenz.

(Hoz Yenlingz)

● Ndwen 10 ngoenz 12, Dwzbauj Yen Sanghvugiz caeuq Cang' veiz Cizdonz Guengjsae Faen Gunghsw haiguh "bangrengz Dwzbauj · densangh banggunz" goeng' ik banggunz giensoengq hozdung. Baez hozdung neix Cang' veiz Cizdonz gien 10 aen densigih yezcingh caeuq gaj-ngaenzgoek boujdiep gyahden hawj ranz dihbauj, ranz ndangcanz caeuq ranzgungzhoj wng, gaj-ngaenzgoek mbaw dij cienz 1200 maenz, baujdaej boujdiep 37 fanh maenz, giensoengq gyaqcienz dij 40 fanh maenz.

(Nungz Yisiuh Yangz Goz-swnng)

● Geij bi neix daeuj, Yungzsuij Myauzcuz Swciyen giethab hong canjnieb vut gungz, mboujduenh gyalai bued ngaenz-cienz, mizyauq cingjhab gak hangh feihyiz swyenz caemhcaiq hableix haifat leixyungh, daengx yienh swnjcienz baujhoh caeuq leixyungh feihvuzciz vwnzva yizcanj aeundaej cingzeik ndei, minzcu vwnzva hwnjguh rengz-rwd bang doi vnzlai dangdieg vut gungz baenz miz.

(Luj Bungz)



Lozcwngz: Eu Fwen Angqcoux Cibgouj Daih

罗城:唱响山歌喜迎十九大

Ndwen 10 ngoenz 15 banhaemh, Lozcwngz Mulaujcu Swciyen banh hoihfwen angqcoux Cibgouj Daih dangj, gyoengq canghfwen ndang daenj buhvaq minzcu yiedcingz doiq fwen, danqhaenh guekcoj, gyo' mbaiq aencingz dangj, gangjok gij maqmuengh caeuq gij simcingz angqyangz beksingq gak minzcu doiq Cibgouj Daih dangj hai ndaej ndei haenx. Ndaw doz dwg canghfwen cingq doiq fwen.

(Mungz Cwnghsw/蒙增师)

Yungzanh Binaengz Bued Cien Fanh Maenz Bangfuz Makgaemjgaet Canjnieb

融安每年投千万元扶持金桔产业

Yungzanh Yen gyavaiq canjnieb diuzcingi, guh hung guh ak mak-gaemjgaet daengj daegsaek youhsi canjnieb, vih ginghci ndawbiengz hwngfat daezhawj rengzrwd cengjdingj.

Geij bi neix daeuj, Yungzanh Yen haenqca "it mak hwng bak hangznieb" caeuq nungzyez "sam aen it" (it mak it faex it cuk) canjnieb, daj bi 2014 haindu henzguh "yungh ciengj lawh bouj" leih beksingq cwngcwz, binaengz cuengqhaeuj 1000 fanh maenz bangfuz hwngfat mak-gaemjgaet canjnieb, caemhcaiq daiq-doengh ngaenzcienz ndawbiengz mauhvaq 4 ik maenz cuengqhaeuj makgaemjgaet canjnieb. Daengz bi 2016, daengx yienh dajndaem mak-gaemjgaet mienhcik daengz 12.1 fanh

moux, canjliengh 11.5 fanh dun, canjeiz daengz 5.1 ik maenz. Bineix ndwen 3 ngoenz 5, 《Deihleix Geiq-hauh Byauhcuñ Canjbij Mak-gaemjgaet Yungzanh》 Guengjsae deihfueng byauhcuñ haindu henzguh, dienzbouj gij hoengq mak-gaemjgaet Yungzanh mbouj miz deihfueng byauhcuñ. Aen yienh neix gaenxmaenx doidoengh dingh' ok makgaemjgaet guekgya byauhcuñ caeuq hangznieb byauhcuñ, giengz-vaq byauhcuñja swnghecanj, hawj makgaemjgaet Yungzanh daj "ranz-ranz cungj rox" byaijcoh "seiqgyaiq okmingz", hawj gyoengq boux ndaem mak aenvih makgaemjgaet baenz miz.

Doengzseiz, aen yienh neix yungh gij vunqsik "nungzhoh + gihdi +

hozcozse + hezvei + lijyouz" hwngfat makgaemjgaet canjnieb. Laebbaenz hozcozse, sonyinx nungzhoh yungh cwngcwz boujdiep ngaenzcienz, goengrengz, diegnamh, diegbya gienzsawjyungh daengj fuengsik haeujguj, camgya hozcozse hwngfat. Aeu hozcozse gyahaeuj yienh gaep makgaemjgaet hangznieb hezvei, youz hezvei daezhawj bwnh ndei gyaqcienz daemq, dinfwngz gohyoz ndaem guenj, doengjit gai doengjit cawx daengj baucaez fuzvu hawj bouxguhnaz, caemhcaiq daiqdoengh hozcozse caeuq lijyouzyez dox giethab, caux-laeb suen yawjngonz makgaemjgaet swnghdai, bouxguhnaz vihneix ndaej souik faenhoengz.

(Cinz Swjgen)